

ZAKON
O AGENCIJI ZA RAD I ZAPOŠLJAVANJE BOSNE I HERCEGOVINE
(¹Neslužbeni prečišćeni tekst)

I - OPĆE ODREDBE

Član 1.

Ovim zakonom osniva se Agencija za rad i zapošljavanje Bosne i Hercegovine (u daljem tekstu: Agencija) kao samostalna upravna organizacija, uređuje njena nadležnost i druga pitanja od značaja za organizaciju i funkcioniranje Agencije.

Član 2.

Agencija obavlja stručne i druge poslove koji se odnose na oblast zapošljavanja u okviru nadležnosti Bosne i Hercegovine, a koji uglavnom zahtijevaju primjenu stručnih i naučnih metoda rada i s njima povezanih upravnih poslova.

II - AGENCIJA ZA RAD I ZAPOŠLJAVANJE BOSNE I HERCEGOVINE

Član 3.

1. Agencija ima status pravnog lica.
2. Sjedište Agencije je u Sarajevu.

Član 4.

1. Agencija ima pečat, koji je izrađen u skladu sa Zakonom o pečatu institucija Bosne i Hercegovine ("Službeni glasnik BiH", broj 12/98).
2. Naziv Agencije i državni grb bit će postavljeni na zgradi u kojoj je smještena Agencija.
3. Naziv Agencije bit će napisan na bosanskom, hrvatskom i srpskom jeziku latiničnim i ćirilničnim pismom.

Član 5.

Jezici, koji su u službenoj upotrebi u Bosni i Hercegovini, koristit će se ravnopravno u radu Agencije.

III - NADLEŽNOSTI AGENCIJE

Član 6.

Agencija je nadležna da:

- a) u oblasti zapošljavanja iz svoje nadležnosti predstavlja Agenciju i saraduje s nadležnim agencijama, institucijama i međunarodnim organizacijama u tim oblastima;**
- b) u koordinaciji s Ministarstvom civilnih poslova Bosne i Hercegovine (u daljnjem tekstu: resorno ministarstvo BiH) izvršava preuzete međunarodne obaveze iz oblasti zapošljavanja, a saradujući s nadležnim entitetskim zavodima za zapošljavanje i**

¹ Neslužbeni prečišćeni tekst sadrži: Zakon o Agenciji za rad i zapošljavanje Bosne i Hercegovine ("Službeni glasnik BiH" broj 21/03) i Zakon o izmjenama i dopunama Zakona o Agenciji za rad i zapošljavanje Bosne i Hercegovine ("Službeni glasnik BiH" broj 43/09) – označen **podebljanim slovima**.

Zavodom za zapošljavanje Brčko Distrikta Bosne i Hercegovine (u daljnjem tekstu: Zavod za zapošljavanje Brčko Distrikta);

c) prati primjenu međunarodnih standarda i politika u oblasti zapošljavanja i u saradnji s entitetskim zavodima za zapošljavanje i Zavodom za zapošljavanje Brčko Distrikta učestvuju u njihovom provođenju;

d) inicira zaključivanje međunarodnih ugovora u oblasti zapošljavanja i učestvuje u vođenju pregovora za zaključivanje međunarodnih ugovora u oblasti socijalnog osiguranja za dio nezaposlenosti i prati njihovo provođenje u saradnji sa zavodima za zapošljavanje entiteta i Brčko Distrikta;

e) koordinira aktivnosti u domaćim i međunarodnim projektima u oblasti zapošljavanja koji su od interesa za Bosnu i Hercegovinu i saraduje s entitetskim zavodima za zapošljavanje i Zavodom za zapošljavanje Brčko Distrikta u njihovoj realizaciji;

f) prikuplja strane i domaće zahtjeve i informacije o ponudi i potražnji domaće i strane radne snage i u saradnji s entitetskim zavodima za zapošljavanje i Zavodom za zapošljavanje Brčko Distrikta realizira ih u granicama svojih nadležnosti i mogućnosti tržišta rada u Bosni i Hercegovini;

g) prati, analizira i istražuje privredna, društvena i druga kretanja, stanje zaposlenosti i nezaposlenosti, te njihove međusobne uticaje u saradnji s entitetskim zavodima za zapošljavanje i Zavodom za zapošljavanje Brčko Distrikta, na osnovu čega predlažu potrebne mjere i aktivnosti na unapređivanju zapošljavanja;

h) inicira potrebne aktivnosti kod entitetskih zavoda za zapošljavanje i Zavoda za zapošljavanje Brčko Distrikta da se zajednički i u saradnji s poslodavcima, sindikatima, obrazovnim ustanovama i drugim udruženjima organiziraju i provode programi profesionalnog usmjerenja i obrazovanja s ciljem većeg zapošljavanja i drugih oblika aktivne politike zapošljavanja;

i) koordinira u zapošljavanju bosanskohercegovačkih građana u inozemstvu u granicama svojih zakonskih nadležnosti i u saradnji s entitetskim zavodima za zapošljavanje i Zavodom za zapošljavanje Brčko Distrikta;

j) provodi potrebne analize i sastavlja izvještaje i dokumente iz oblasti zapošljavanja, sačinjava nacрте, prijedloge i radne materijale dokumenata koje usvajaju i donose organi vlasti Bosne i Hercegovine po iskazanim zahtjevima Vijeća ministara BiH i resornog ministarstva BiH, po potrebi uz saradnju s entitetskim zavodima za zapošljavanje i Zavodom za zapošljavanje Brčko Distrikta;

k) predlaže Vijeću ministara BiH dugoročni, srednjoročni i godišnji plan o smjernicama politika tržišta rada i aktivnim mjerama zapošljavanja u Bosni i Hercegovini zajedno s entitetskim zavodima za zapošljavanje i Zavodom za zapošljavanje Brčko Distrikta, a posredstvom resornog ministarstva BiH;

l) u saradnji s entitetskim zavodima za zapošljavanje i Zavodom za zapošljavanje Brčko Distrikta, daje resornom ministarstvu BiH mišljenje i prijedloge za zapošljavanje stranaca u Bosni i Hercegovini (kvote);

m) u saradnji s entitetskim zavodima za zapošljavanje i Zavodom za zapošljavanje Brčko Distrikta, osigurava neophodne podatke u oblasti nezaposlenosti, posebno onih koji se odnose na izvršavanje međunarodnih obaveza;

- n) dostavlja svoje redovne godišnje izvještaje o radu i godišnje programe rada Vijeću ministara BiH;
- o) provodi obuku i osposobljavanje svog kadra kako bi se odgovorilo zahtjevima i izazovima međunarodnih obaveza i integracijskih procesa, te inicira isto kod entitetskih zavoda za zapošljavanje i Zavoda za zapošljavanje Brčko Distrikta.

IV - UNUTRAŠNJA ORGANIZACIJA

Član 7.

Unutrašnja organizacija Agencije uređuje se Pravilnikom o unutrašnjoj organizaciji, koji donosi direktor, uz saglasnost Vijeća ministara.

- 2. Pravilnik se dostavlja Vijeću ministara BiH na saglasnost.**
- 3. Pravilnik o unutrašnjoj organizaciji Agencije mora biti u skladu s državnim zakonom o upravi.**

V - OVLAŠTENJE, OBAVEZE I ODGOVORNOSTI DIREKTORA AGENCIJE I NJEGOVOG ZAMJENIKA

Član 8.

- 1. Direktor Agencije rukovodi radom Agencije.
- 2. Direktor Agencije predstavlja i zastupa Agenciju, osigurava i organizira izvršavanje zadataka u skladu sa zakonom, donosi podzakonske akte kada je za to ovlašten zakonom, izdaje druge akte u skladu s ovlaštenjima, preduzima i druge mjere iz nadležnosti Agencije.

Član 9.

Direktor Agencije ima jednog zamjenika koji pomaže direktoru u vođenju Agencije. Zamjenik direktora zamjenjuje direktora Agencije u slučaju spriječenosti ili nemogućnosti direktora da obavlja svoju dužnost, sa svim ovlaštenjima kao i direktor.

Član 10.

- 1. Direktora i zamjenika direktora Agencije imenovat će Vijeće ministara Bosne i Hercegovine i bit će iz različitih entiteta, na prijedlog ministra i zamjenika ministra civilnih poslova, vodeći računa o ravnopravnoj zastupljenosti svih naroda.
- 2. Direktor i zamjenik direktora Agencije imenuju se na period od četiri godine.

Član 11.

Direktor Agencije, u saradnji sa zamjenikom direktora, priprema Pravilnik o unutrašnjoj organizaciji Agencije.

VI - SAVJETODAVNI ODBOR AGENCIJE

Član 12.

- 1. Kao savjetodavni organ Agencija ima Savjetodavni odbor.**
- 2. Savjetodavni odbor Agencije ima sljedeće nadležnosti:**

- a) daje mišljenje na sačinjeni godišnji pregled politika zapošljavanja u Bosni i Hercegovini;
- b) daje mišljenje na prijedloge za zapošljavanje stranaca u Bosni i Hercegovini (kvote);
- c) daje mišljenje na godišnje programe rada Agencije i godišnje izvještaje o radu Agencije;
- d) daje mišljenje na izvještaje o preuzetim međunarodnim obavezama Bosne i Hercegovine u oblasti zapošljavanja;
- e) daje mišljenje na rad Agencije i Pravilnik o unutrašnjoj organizaciji Agencije i daje preporuke u vezi s unapređenjem rada Agencije;
- f) inicira i predlaže aktivnosti i mjere Agencije na unapređenju oblasti zapošljavanja na nivou Bosne i Hercegovine.

Član 13.

Savjetodavni odbor Agencije čini jedan predstavnik resornog ministarstva BiH u čiji djelokrug spada oblast zapošljavanja, jedan eminentni naučni radnik iz oblasti zapošljavanja kojeg imenuje resorno ministarstvo BiH na prijedlog Agencije, po jedan predstavnik resornih entitetskih ministarstava i Vlade Brčko Distrikta BiH, te po jedan predstavnik sindikata i poslodavaca kojeg predloži svaki od ekonomsko-socijalnih vijeća entiteta i Brčko Distrikta BiH. Direktor Agencije i njegov zamjenik, kao i direktori entitetskih zavoda za zapošljavanje i Zavoda za zapošljavanje Brčko Distrikta po funkciji učestvuju u radu Savjetodavnog odbora, bez prava odlučivanja.

Član 14.

Savjetodavni odbor donosi Poslovnik o radu.

VII - SREDSTVA ZA FINANSIRANJE RADA AGENCIJE

Član 15.

Sredstva za rad Agencije utvrđuju se u Budžetu institucija BiH.

VIII - PRIJELAZNE I ZAVRŠNE ODREDBE

Član 16.

Danom stupanja na snagu ovog zakona prestaje s radom Zavod za zapošljavanje Bosne i Hercegovine.

Član 17.

Danom stupanja na snagu ovog zakona, opremu, arhiv i imovinu Zavoda za zapošljavanje Bosne i Hercegovine preuzima Agencija.

Član 17a.

Obavezuje se Agencija da svoje normativne akte, u roku od tri mjeseca od dana stupanja na snagu ovog zakona, uskladi s ovim zakonom.

Član 18.

Ovaj zakon stupa na snagu osmog dana od dana objavljivanja u "Službenom glasniku BiH", a bit će objavljen u službenim glasilima entiteta i Brčko Distrikta Bosne i Hercegovine.

*

"Službeni glasnik BiH" broj 43/09

Član 8.

Ovaj Zakon stupa na snagu osmog dana od dana objavljivanja u "Službenom glasniku BiH", a bit će objavljen i u službenim glasilima entiteta i Brčko Distrikta BiH.